

एफिससय् च्वंगु मण्डलीयात पावलं च्वःगु पौ म्हसीका

पावलं थ्व पौ एफिससय् च्वंपिन्त “स्वर्ग व पृथ्वीइ सृष्टि यानातःगु फुक्क ख्रीष्टयागु ल्हातय् लःल्हानादी” धयागु परमेश्वरयागु ग्वसाःया खँयात कयाः च्वःगु खः। नापं थुकी परमेश्वरया मनूतय्त येशू ख्रीष्टलिसे छप्पं जुयाः च्वनेत नं इनाप यानातःगु दु।

थ्व सफूया न्हापांगु ब्वय् पावलं छप्पं जुयाः च्वनेगु खँ च्वयातःगु दु। परमेश्वर बाःनं थः मनूतय्त गुकथं ल्ययादिल, गुकथं इमिगु पाप क्षमा जुल, गुकथं इपि वय्कःया काय् ख्रीष्टपाखें पापं मुक्त जुल, परमेश्वरं गुकथं इमित पवित्र आत्मा बैनाकथं बियादिल धयागु खँ व ख्रीष्टं यहदी व यहदीमखुपिन्त ब्यागः तयातःगु दथुइया पःखाः थुनाब्युगु खँ नं थुकी न्ह्यथनातःगु दु।

सफूया निगुगु ब्वय् पावलं विश्वासीतय्त ख्रीष्टलिसे छप्पं जुयाच्चना धयागु खँ व्यवहारय् नं यानाः क्यनेमाः धकाः धयातःगु दु।

पावलं परमेश्वरया मनूत ख्रीष्टलिसे छप्पं जुयाः गुकथं मिले जुयाच्चनेमाः धयागु खँ ध्वाथुइकेत थीथी नमूना बियातःगु दु। गथे – मण्डली म्ह खः, ख्रीष्ट छयं खः। मण्डली छें खः, ख्रीष्ट उकिया मू ल्वहं खः। मण्डली भम्चा खः, ख्रीष्ट मिजं खः। थ्व पौलय् परमेश्वरं झीत गुलि दया माया यानादी धयागु खँ पावलं तसकं च्वछायाः च्वयातःगु दु। शैताननापं ल्वायेत छु यायेमाः धयागु खँ नं थुकी न्ह्यथनातःगु दु। ख्रीष्टयागु माया, बलिदान, क्षमा, दया माया व शद्धताया जलय् न्ह्यागु खं खने दइ। धलः पौ

न्ह्यारखें १:१-२

ख्रीष्ट व मण्डली १:३-३:२१

ख्रीष्टपाखें न्हगु जीवन ४:१-६:२०

क्वचाय्कूगु ६:२१-२४

एफिसी

पावलपाखें ज्वजलपा

1 परमेश्वरं हे ख्रीष्ट येशूयाम्ह प्रेरित यानातःम्ह पावलपाखें एफिससय् च्वंपि ख्रीष्ट येशूयात विश्वास यानाच्चंपि परमेश्वरया मनूतयत् ज्वजलपा!✧

2 झी परमेश्वर बाः व प्रभु येशू ख्रीष्टया दया माया व शान्ति छिमिके दयाच्वनेमा।

ख्रीष्टया मनूतयत् परमेश्वरं

आशिष बियादी

3 ख्रीष्टयात विश्वास यानागुलि परमेश्वरं झीत स्वर्गयागु फुक्क आशिष बियादीगुलि झी प्रभु येशू ख्रीष्टया बाः परमेश्वरयात तःधकेमाः।

4 संसार मदुनिबलय् हे परमेश्वरं झीत वय्कःया न्ह्यःने धर्मी ठहरय् जुइत व पवित्र यायेत ल्ययादीगु खः।

5 वय्कलं झीत माया यानाः येशू ख्रीष्टपाखें थःकाय्पिं यानादिल। वय्कलं थः यःकथं हे थथे यानादीगु खः।

6 वय्कलं झीत थथे तःधंगु दया माया यानादीगुलि झीसं वय्कःयात तःधकेमाः। वय्कलं थः यःम्ह कायपाखें झीत दया माया यानादिल।

7 ख्रीष्ट येशूं हि हाय्कादीगुलि झीगु पाप क्षमा जुल। अले झीत छुत्कारा बियादिल। परमेश्वरयागु दया माया गुलि तःधं!✧

8 वय्कलं फुक्क ज्ञान व बुद्धि बियाः झीत यक्व दया माया यानादिल।

9 ख्रीष्टपाखें पूर्वकादीगु फुक्क गुप्ति ज्याखँ वय्कलं झीत सीके बियादिल।

10 पाय्छिगु ई वइबलय् स्वर्ग व पृथ्वीइ दुगु फुक्क खँ ख्रीष्टया अधीनय् हयेगु परमेश्वरया ग्वसाः खः।

11 परमेश्वरं थ्व फुक्क न्हापा हे क्वःछिना तःकथं यानादीगु खः। वय्कलं झीत न्हापांनिसें हे ख्रीष्टनाप मिलय् यानाः थः मनू यायेत ल्ययादीगु खः।

12 झीपिं ख्रीष्टयाके भरोसा तयापिं दक्वसिबय् न्हापां हे ल्ययातःपिं खः। उकिं परमेश्वरयात झीसं तःधके।

13 अथे हे छिमिसं नं थ्व मुक्ति बीगु सत्य व भिंगु खँ न्यनाः ख्रीष्टयात विश्वास यात। अले थःम्हं बाचा चिना तःकथं पवित्र आत्मा बैना बियाः परमेश्वरं छिमित थः मनू यानादिल।

14 परमेश्वरं बी धकाः धयादीगु झीत नं दइ, अले वय्कःया थः मनूतयत् पापं छुतय् यानादी धयागु दसिकथं झीत पवित्र आत्मा बियातःगु खः। झीसं वय्कःयात तःधके।

पावलं परमेश्वरयात सुभाय् देछाःगु

15 छिमिसं येशू ख्रीष्टयात क्वान्तुक विश्वास यानाच्चंगु व फुक्क विश्वासीतयत् दया माया यानाच्चंगु खँ न्यनाः

16 जिं परमेश्वरयात न्हाबलें सुभाय् बियाच्चनागु दु। अले प्रार्थना यायेबलय् छिमित नं लुमंकाच्चनागु दु।

17 ज्ञान बीम्ह व परमेश्वरयात म्हसीका बीम्ह पवित्र आत्मा छिमित बियादीमा धकाः जिं दकलय् तःधंम्ह व येशू ख्रीष्टया बाः परमेश्वरयाके पवनाच्चना।

18 परमेश्वरयागु ज्याखँ फुक्क थुइके फय्केत छिमिगु नुगः चाय्कादिसँ धकाः नं जिं प्रार्थना यानाच्चनागु दु। अले छु आशायागु निति वय्कलं छिमित सःतादीगु खः व वय्कलं थः मनूतयत् छु छु आशिष बियादी धकाः धयादीगु खः, छिमिसं सी।

19 अले वय्कःयात विश्वास याःपिन्त ग्वाहालि यानादीगु वय्कःया शक्ति गुलि तःधं धयागु सीमा धकाः नं जिं प्रार्थना यानाच्चनागु दु। वय्कःया शक्ति तसकं तःधं।

20 थ्व हे शक्ति वय्कलं सी धुंकूम्ह ख्रीष्टयात म्वाकाः स्वर्गय् थःगु जवय् तयादिल।*

21 ख्रीष्ट फुक्क अधिकार दुम्ह, शासन यानादीम्ह, शक्ति जाःम्ह व फुक्क प्रभुत स्वयाः नं तःधंम्ह खः। वय्कःयात थ्व संसारय् जक मखु, वइतिनिगु संसारय् नं फुक्क नां स्वयाः चवय् तयादिल।

22 थुकथं दक्व फुक्कं परमेश्वरं ख्रीष्टयागु अधीनय् तयादिल। अले मण्डलीया* थकालि नं यानादिल।*

23 मण्डली ख्रीष्टयागु म्ह खः। थ्व हे म्ह न्हाथाय् दीम्ह व न्हागु खं पूर्वकादीम्ह वय्कःयागु पूर्वगु रूप खः।*

2

परमेश्वरं डीगु पाप क्षमा यानादी

1 छिपिं थःगु अपराध व पापं यानाः सीपिन्त वय्कलं म्वाकादिल।

2 थ्व संसारयापि मनूतयसं थें छिमिसं नं पापी ज्याखँ याना जूगु खः। अले मभिगु ज्याखँया नायः शैतानं धाःथें जुयाच्चंगु खः। थ्व शैतानं परमेश्वरयात विश्वास मयाःपिन्त थःगु ल्हातय् कयातःगु दु।

* 1:20 १:२० भज ११०:१ * 1:22 १:२२ मण्डली ग्रीक भाषां एकलेसिया * 1:22 १:२२ भज ८:६ * 1:23 १:२२-२३ कल १:१८

3 झीपिं नं छकः इपिं थें हे जुइ धुनागु दु, झीसं नं थःत यःथें यानाः मोजमज्जा याना जुइ धुन। थुकथं मेपि थें झीपिं नं परमेश्वरयागु तं फये मालीपि जुइ धुन।

4 अयनं परमेश्वरं झीत तसकं तःधंगु दया माया क्यनादीगु दु।

5 झीपिं सीपिं मनूत थें पापी जुया च्वंसां ख्रीष्टं झीगु पाप क्षमा यानादिल। परमेश्वरयागु तःधंगु दया मायां छिमित थथे मुक्ति बियादीगु खः।*

6 झीसं ख्रीष्टयात विश्वास यानागुलि वय्कलं झीत हानं म्वाकाः वय्कः नाप स्वर्गय् तयादिल।

7 झीत परमेश्वरं दया माया यानादी धकाः सीके बीत थथे यानादीगु खः। थ्व दया माया ख्रीष्ट येशूपाखें परमेश्वरं झीत न्हाबलेया निति क्यनादीगु दु।

8 परमेश्वरयात छिमिसं विश्वास याःगुलि छिमित वय्कलं दया माया यानाः मुक्ति बियादीगु खः। छिमिगु थःगु हे कुतलं थ्व मुक्ति दुगु मखु। थ्व ला परमेश्वरयागु वरदान खः।

9 छिमिगु धर्मकर्म थथे जगु मखु, उकिं छिमिसं तःधंछुइगु खँ हे मदु।

10 छायाःसा झीपिं भिंगु ज्याया निति ख्रीष्ट येशूपाखें सृष्टि यानातःपि वय्कःया ल्हाःया सीप खः। वय्कलं न्हापानिसें दय्कातःगु भिंगु ज्याखँ झीगुपाखें जुइ फयेमा धकाः झीत तयार यानादीगु खः।

यहदी व यहदीमखुपि ख्रीष्टपाखें मिलय् जुल

11 न्हापायागु खँ लुमंकी, म्हय् चिं तयातःपि यहदीतय्सं छिमित म्हय् चिं मतःपि यहदीमखुपि धकाः धाइगु खः।

12 बिचाः या, छिपिं ख्रीष्टपाखें तापाना च्वंपि खः। छिपिं इस्त्राएलयागु हकं पिनेलाःपिं, परमेश्वरं चिनादीगु बाचां पिनेलाःपिं, आशा धयागु हे त्वफिका च्वंपिं, व परमेश्वर हे मदय्का च्वंपिं जुयाच्वंगु खः।

13 उबलय् छिपिं ख्रीष्ट येशूपाखें तापाना च्वंपि खः। आः धाःसा छिमित ख्रीष्टयागु हिं हे वय्कः नाप सत्तिकादिल।

14 थः हे क्रूसय् सिनाः वय्कलं यहदीत व यहदीमखुपिनिगु दथुइच्वंगु पःखाः थुनाः थःथवय् मिलय् यानाः झीत शान्ति बियादिल।

15 थथे यायेत वय्कलं यहदीतयगु व्यवस्थाय् च्वंगु आज्ञा व नियम त्वथुलादिल। अले यहदीतयत् नं यहदीमखुपिन्त नं थःत विश्वास याकाः मिलय् यानाः छम्ह हे यानादिल। थुकथं वय्कलं झीत शान्ति बियादिल।*

16 थुकथं ल्वापुरख्यापु मदयकाः क्रूसय् सिनाः वय्कलं यहदीतयत् नं यहदीमखुपिन्त नं छम्ह हे यानादिल।☆

17 थथे यायेत वय्कलं परमेश्वरलिसे तापाना च्वंपिं व सत्तिना च्वंपिन्त नं शान्तियागु खँ न्यंकादिल।☆

18 वय्कलं यानाः हे झीपिं यहदीत नं यहदीमखुपिं नं पवित्र आत्मा दयाः परमेश्वर बाःया न्ह्यःने वने फत।

19 उकिं छिपिं आः यहदीमखुपिं जूसां इस्राएलयागु हकं पिनेलाःपिं व परमेश्वरयागु बाचां पिनेलाःपिं मखुत। बरु आः छिपिं नं इस्राएलयागु हकं थ्याःपिं व परमेश्वरया जहानया दुजः जुल।

20 प्रेरिततय्सं व अगमवत्तातय्सं स्वना थकूगु जगय् दय्कूगु छँ छिपिं नं खः। अले थ्व जगयागु म् ल्वहं येशू ख्रीष्ट खः।

21 वय्कलं हे फुक्कसितं मिलय् यानाः थ्व छँयात परमेश्वर च्वनादीगु पवित्रगु देगः यानादी।

22 छिपिं नं मेपिं थें पवित्र आत्माय् परमेश्वर च्वनादीगु छँ जुइत नापनापं च्वजाया वनी।

3

पावलं यहदीमखुपिन्थाय् सेवा याःगु

1 छिपिं यहदीमखुपिं मनूतयत् परमेश्वरयागु भिंगु खँ न्यंका जुयागुलि जि ख्रीष्टया च्यः पावल थथे इयालखानाय् कुंका च्वनेमाल।

2 छिमित हे न्यंकेत परमेश्वरं दया माया यानाः जितः थ्व भिंगु खँ न्यंकेगु ज्या बियादीगु खः धकाः ला छिमिसं सि हे स्यु।

3 परमेश्वरं वय्कःयागु गुप्ति खँ जितः सीके बियादिल। थ्व हे खँ जिं न्हापा नं चिहाकय्क च्वये धुन।

4 जिं च्वयाहयागु थ्व खँ ब्वन धाःसा जिं ख्रीष्टयागु गुप्ति खँ गुलि स्यु धकाः छिमिसं सीके फइ।☆

5 थ्व गुप्ति खँ न्हापा न्हापायापिं मनूतय्सं मस्यु। थौं कन्हय् परमेश्वरं वय्कःया पवित्र प्रेरिततयत् व अगमवत्तातयत् थ्व गुप्ति खँ पवित्र आत्मापाखें सीके बियादीगु दु।

6 जिं धयाच्चनागु गुप्ति खँ थ्व हे खः – परमेश्वरयागु भिंगु खँ न्यना काःगुलि यहदीतयूत थें यहदीमखुपिन्त नं परमेश्वरं उतिकं आशिष बियादी। थुपिं निखलः नं छम्ह हे खः। परमेश्वरं थुमित नं ख्रीष्ट येशूयात विश्वास याक्वसित बी धकाः धयादीगु बियादी।

7 परमेश्वरं दया यानाः हे जितः थथे भिंगु खँ न्यकं जुइम्ह यानादिल। थःगु शक्तिं वयकलं जितः थथे यानादिल।

8 परमेश्वरया चिधंम्ह स्वयाः नं अज्ज चिधंम्ह मनू जितः हे ख्रीष्टयागु तःजिगु भिंगु खँ यहदीमखुपिन्त न्यकः वनेगु ज्या परमेश्वरं लःल्हानादिल।

9 दक्व फुक्कं सृष्टि यानादीम्ह परमेश्वरं न्हापांनिसें थ्व गुप्ति खँ सुयातं सीके बियामदी। आः धाःसा वयकलं थ्व गुप्ति खँ जिगुपाखें फुक्क मनूतयूत सीके बियादीगु दु।

10 आः ला मण्डलीपाखें आकाशय् राज्य याइपिं व अधिकार दुपिन्त परमेश्वरयागु तःधंगु ज्ञान सीके बीत थथे थ्व गुप्ति खँ उलादीगु खः।

11 परमेश्वरं न्हापांनिसें हे ग्वसाः ग्वयादीगु थ्व ज्या झी प्रभु ख्रीष्ट येशूपाखें पूवकादिल।

12 ख्रीष्टयात विश्वास यानागुलि झीपिं मग्यासे हे परमेश्वरया न्ह्यःने वने फु।

13 अयजूगुलि जिं थथे दुःखकष्ट सियाच्चनागु खनाः छिमिसं आशा त्वःते मते धकाः जिं इनाप यानाच्चना। थुकिं छिमित हे भिं जुइ।

ख्रीष्टयागु माया

14 उकिं जिं पुलि चुयाः परमेश्वर बाःयात प्रार्थना यानाच्चना।

15 वयकलं हे स्वर्गय् च्वंपिं व पृथ्वीइ च्वंपिं फुक्कसित जीवन बियादीगु खः।

16 वयकःयागु तःधंगु आशिषं व वयकःयागु आत्मापाखें छिमित शक्ति दयेमा, अले व हे शक्तिं छिपिं दुनुगलंनिसें बल्लाना च्वनेमा धकाः जिं प्रार्थना यानाच्चनागु दु।

17 उकिं विश्वासं यानाः ख्रीष्ट छिमिगु नुगलय् च्वनादी। छिमिगु नुगलय् मायां हा काय् फयेमा, अले छिपिं मायायागु लिधंसाय् च्वने फयेमा धकाः जिं प्रार्थना यानाच्चनागु दु।

18 अले छिमिसं नं परमेश्वरया मनूतयसं थें ख्रीष्टयागु मायायागु हाकः, ब्या, जाः गुलि दु धकाः बांलाक सीके फइ।

19 दक्व ज्ञान बुद्धि स्वयाः नं तःधंगु वयकःयागु मायायात छिमिसं थुइके फयेमा, अले वयकःयागु फुक्क भिंगु बांलाःगु खं छिमिगु नुगः जायाच्चनेमा धकाः नं जिं प्रार्थना यानाच्चनागु दु।

20 झीत बियादीगु शक्तिं झीसं फ्वनागु स्वयाः नं अप्वः अले मनय् तयागु स्वयाः नं अप्वः बी फुम्ह परमेश्वर

21 मण्डली व ख्रीष्ट येष्पाखें सदां तःधनेमा। आमेन।

4

फुक्कं मिलय् जुयाः च्वनेमाः

1 प्रभुयागु ज्या यानाः कुंका च्वनेमाःम्ह जिं छिमित प्रभुयात यःकथं ज्याखँ याना च्वँ धकाः दुनुगलंनिसें बिनित्ति यानाच्चना।

2 न्ह्याबलें क्वमिलु, स्वजा व सह याइपिं जुयाः थःथवय् माया यानाः☆

3 पवित्र आत्मायागु ग्वाहालि छिपिं फुक्कं छम्ह थें जुयाच्चनेगु कुतः या। अले छिमित शान्ति दइ।

4 गथे परमेश्वरं छिमित छगू हे आशाया निति सःतादीगु खः, अथे हे छिमिगु म्ह नं छगू हे, आत्मा नं छगू हे खः।

5 अथे हे प्रभु नं छम्ह हे जक, विश्वास नं छगू हे जक, अले बप्तिस्मा नं छगू हे जक दु।

6 अले हानं सकसियां परमेश्वर बाः नं छम्ह हे जक दु। वयकः फुक्कसियां प्रभु, फुक्क ज्या यानादीम्ह व सकसिकें दीम्ह खः।

7 तर ख्रीष्टया वरदानया नापकथं झीपिं सकसित अनुग्रह बियादीगु दु।

8 थथे च्वयातःगु दु –

“प्रभु स्वर्गय् थाहां झायारीबलय्

ज्वनातःपिन्त नं थःलिसें यंकादिल।

अले मनूतय्त वरदान बियादिल।”☆

9 प्रभु थाहां झाल धाःगु छु खः? थुकिं ख्रीष्ट पृथ्वीइ क्वय् थ्यंक झाःगु दु धकाः सीदत।

10 क्वहां झाःम्ह वयकः हे खः। अले फुक्कभनं न्यनादीत वयकः स्वर्ग स्वयाः च्वय् थ्यंक नं थाहां झाल।

11 वयकलं हे गुम्हयसितं प्रेरित, गुम्हयसितं अगमवक्ता, गुम्हयसितं भिंगु खँ न्यंक जुइम्ह, गुम्हयसितं मण्डलीइ हेरचाह याइम्ह, गुम्हयसितं वचन स्यनेकने याइम्ह यानादिल।

12 परमेश्वरया मनूतयत् ख्रीष्टयागु ज्या याये फयेमा धकाः व वयकःयागु म्ह मण्डलीयात ब्वलंकेत वयकलं थुकथं ल्ययादिल।

13 थुकथं थ्व वरदानयागु ज्यां झीत विश्वासय् छप्पं जुइत व परमेश्वरया काय्यात म्हसीकाः न्ह्यज्यायेत ग्वाहालि बियाच्चनी। अले छन्हू झीपि सिद्ध मनु जुयाः ख्रीष्ट थें जुइ फइ।

14 अले झीपि मखुगु खँ स्यना जुइपि मनूतयगु फयगं खँय् जुइपि मस्त जुइ मखु। इमिगु खं मनूतयत मखुगु लँय् यंकी।

15 दया माया यानाः सत्य खँ ल्हानाः झीपि न्ह्यागु ज्याखँय् नं झीम्ह थकालि ख्रीष्ट थें जुयाः न्ह्यज्यायेमाः।

16 वयकलं हे यानाः फुकक म्हब्व मिलय् जुयाच्चंगु दु, अले म्ह छम्हं माःकथं स्वानाच्चंगु दु। छता छता म्हब्वं थथःगु ज्या याना च्वंसा म्ह छम्हं स्वय् जिया वइ, अले थःथवय् माया यानाः न्ह्यज्याये फइ। ✧

विश्वासीतयत् न्हगु जीवन दइ

17 जिं प्रभुयागु नामय् धयाच्चनागु दु – छिपि आः हानं परमेश्वरयात म्हमस्यूपि थें याना जुइ मते। इमिगु बिचाः हे बांमलाः।

18 इमिगु नुगः अज्जं मचाःनि। परमेश्वरं बियादीगु न्हगु जीवनं इपि अज्जं तापाः नि, छायाःसा इमिगु नुगः तसकं छाः, अले इमिसं छुं हे मस्यु।

19 इमिके लज्या धयागु तकं मदये धुंकल। अले मभिंगु लँय् जुयाः इपि लाः लाः थे याना जुयाच्चंगु दु।

20 ख्रीष्टं ला छिमित थथे या धकाः स्यनादीगु मदु।

21 प्रभुयागु सः छिमिसं ताःगु हे दु। ख्रीष्टपाखें हे धात्थेंगु खँ छिमिसं सय्का काःगु दु।

22 थःत हे स्यंकीगु न्हापायागु चालचलनयात छिमिसं त्वःताछ्व।✧

23 थुकिया पलेसा पवित्र आत्मां छिमिगु बिचाः व पहःयात न्हगु यायेमा।

24 परमेश्वरयात यःकथं जुयाः वयकःया न्ह्यःने धर्मी ठहरय् जुयाः अले पवित्र जुयाः छिपिं परमेश्वरं दय्कादीपिं न्हपि मनूत जुयाच्चवँ।✧

25 अय्जुगुलि मखुगु खँ ल्हायेगु त्वःताः थःथवय् खःगु खँ जक ल्हाना जु, छायाधाःसा झीपिं फुक्कं ख्रीष्टयागु म्हया छता छता म्हब्व खः।☆

26 छिमिसं तं पिहां वइब्लय् तमय् छुं कथंया पाप याये मते। निभाः बी न्ह्यः हे छिमिगु तं क्वलायेमाः।☆

27 शैतानयात थःपिन्त स्यंके बीत लँ बी मते।

28 खँज्या याइम्हयसिनं खुइगु त्वःति। अले थःगु हे ल्हातं ज्या यानाः मगाःमचाःपिन्त नं ग्वाहालि याये फय्केमाः।

29 छिमिगु म्हतुं बांमलाःगु खँ पिहां मवयेमा। माःगु, भिगु व ज्युगु जक खँ ल्हाना जु। अले न्यनीपिन्त नं न्ह्याइपुसे च्वनी।

30 थुलि जक मखु, पवित्र आत्मायात दुःख बी मते, छायाधाःसा पवित्र आत्मा उद्धार बी खुन्हयात धकाः झीत बियातःगु चिं खः।

31 बांमलाःगु खँ मतिइ तये मते, तं व ल्वापुख्यापु त्वःताछ्व। ईख यायेगु व मेपिन्त क्वह्वांका जुइगु त्वःताछ्व। मेपिन्त स्यंका जुइगु नं त्वःताछ्व।

32 गथे ख्रीष्टयात विश्वास याःगुलि परमेश्वरं छिमित क्षमा यानादिल, अथे हे छिमिसं नं थःथवय् क्षमा बीगु यानाः दया माया याना च्वँ।☆

5

परमेश्वर थें जु

1 छिपिं परमेश्वरया यःपिं मस्त जुगुलि वयकः थें जुइत स्व।

2 ख्रीष्ट येसू झीत माया यानादी थें छिमिसं नं थःथवय् माया यानाः च्वनेगु यायेमाः। ख्रीष्टं झीत माया यानाः नस्वाःगु देछा व बलिकथं थःत परमेश्वरयाथाय् छायादिल।☆

3 व्यभिचार यायेगु, मभिगु मतिइ तथा जुइगु व कर्पिनिगुली मिखा वंकाः जुइगु यानाः जुइ मज्यु।

4 बांमलाःगु खँ, म्वाःमदुगु खँ व घच्चाइपुगु खँ ल्हाना जुइ मते। बरु परमेश्वरयात सुभाय् बीगु याना च्वँ।

5 छिमिसं सि हे स्यु, व्यभिचार यानाजुइपिं, मभिपिं व कर्पिनिगुली मिखा वंकाः जुइपिं मनूत परमेश्वर व ख्रीष्टयागु राज्यय् च्वने खनी मखु। कर्पिनिगुली मिखा वंकाः जुइगु ला मूर्ति पुजा यायेगु ति हे ग्यं।

☆ 4:25 ४:२५ जक ८:१६

☆ 4:26 ४:२६ भज ४:४

☆ 4:32 ४:३२ कल ३:१३

☆ 5:2

५:२ प्रस २९:१८; भज ४०:६

- 6 छिमिसं सुयागुं बकंफुस्लु खँ न्यने मते। थुकिं छिमित स्यंकी। परमेश्वरयात विश्वास मयाइपिन्सं वय्कःयागु तं फयेमाली।
- 7 उकिं थज्याःपिं मनूत नाप बुला जुयाः जुइ मते।
- 8 न्हापा ला छिपिं नं खिउँथाय् जुयाच्चंपिं खः। आः छिपिं प्रभुया जलय् वये धुंकल। उकिं छिमिगु ज्याखँ नं थुकथं हे जुइमाः।
- 9 थथे प्रभुया जलय् च्वंपिन्सं भिंगु, परमेश्वरयात यःगु व खः खःगु जक याना जुइ।
- 10 छिमिसं प्रभुयात यःथें जक यानाजुइगु कुतः या।
- 11 खिउँथाय् जुयाच्चंपिनिगु ज्याखं तापाक हे च्वँ, बरु इमिसं यानाच्चंगु ज्या मभिं धकाः क्यनाब्यु।
- 12 थुमिसं दुनें दुनें याना जगू ज्याखँ ला धायेत तकं मछा।
- 13 छुं नं खँयात जलय् हइबलय् वयागु धात्थेंगु ख्वाःपाः बांलाक खने दइ।
- 14 छायाधाःसा जलय् वल कि जलं खइ। उकिं थथे नं च्वयातःगु दु –

“अय् न्ह्यःगुलु देँ,
सीपिं म्वाना वा।
अले ख्रीष्ट येशू
छिमित जः बियादी।”

- 15 उकिं गथे यानाः जुइमाःगु खः बांलाक होश या। मूर्खत थें मखु, बुद्धि दुपिं थें जु।
- 16 इलं लाःबलय् हे छिमिसं भिंगु ज्याखँ याना जु, छायाधाःसा ई तसकं मभिं।*
- 17 उकिं मूर्ख जुइ मते, बरु प्रभुयात यःकथं ज्याखँ याना जु।
- 18 अय्लाः थ्वँ काय्का जुइ मते, छायाधाःसा थुकिं मनूतय्त बांमलाःगु ज्या याकी, बरु पवित्र आत्मां जाया च्वँ।
- 19 थथःपिं मुनाः भजन, म्ये हालाः दुनुगलंनिसें परमेश्वरयात तःधंका च्वँ।
- 20 न्ह्याबले न्ह्यागु ज्याखँय् नं छिमिसं झी प्रभु येशू ख्रीष्टया नामय् परमेश्वर बाःयात सुभाय् ब्यु।*

निम्हतिपू

कल ३:१८,१९; १ पत्र ३:१-७

- 21 ख्रीष्टयात मानय् यानाच्चपिं जुया: छिमिसं छमहं मेमहयसिगु खँ न्यनेगु या।
- 22 मिसातयसं प्रभुयागु खँ न्यं थें थः भाःतयागु खँ न्यनेमाः।✽
- 23 गथे मण्डली ख्रीष्टया म्ह खः, अले मण्डलीया छ्यं मुक्ति बीमह ख्रीष्ट खः अथे हे मिसातय हामा वया भाःत खः।
- 24 अयजूगुलि गथे मण्डली ख्रीष्ट येशू धाःथें च्वनी, अथे हे मिसात नं थः भाःतं धाःथें च्वनेमाः।
- 25 ख्रीष्ट येशू मण्डलीयात थःगु प्राण बिया तकं माया यानादिल। अथे हे मिजंतयसं नं थः कलाःयात माया यायेमाः।✽
- 26 ख्रीष्ट येशू मण्डलीयात शूद्र यायेत थःगु वचनं व लखं सिलाः शूद्र यानादिल।
- 27 थःगु हे निति धकाः वयक्कलं थज्याःगु पवित्रगु, हुं हे दोष मदुगु, खू मदुगु, स्यमकूगु व बांलाःगु मण्डली दयकादिल।
- 28 अथे हे थःगु म्हयात माया याना तः थें मिजंतयसं थः कलाःयात माया यायेमाः। थः कलाःयात माया याःम्ह मनुखं थःत हे माया याइ।
- 29 सुनानं थःगु म्हयात हेला याइ मखु, बरु ख्रीष्ट येशू मण्डलीयात यानादी थें बांलाक म्हाला-साला याना तइ।
- 30 छायाधाःसा झीपिं वयक्कःयागु म्हया व्वत खः।
- 31 थथे च्वयातःगु दु – “अयजूगुलि मनूत थः मां बौयात त्वःताः कलाःनापं च्वंवनी। अले इपिं निम्हं छमह हे जुइ।”✽
- 32 थ्व छगू तःधंगु गुप्ति खँ खः। अयनं जिं छिमित ख्रीष्ट व मण्डलीया बारे खँ ल्हाना च्वनागु दु।
- 33 न्हागु जूसां मिजंतयसं थः कलाःयात थःत थें माया यायेमाः। अथे हे मिसातयसं नं थः भाःतयात हनाबना तयेमाः।

6

काय्मह्यायपिं व मांबौ

- 1 काय् म्हायपिन्सं थः मांबौनं धाःगु खँ न्यनेमाः। परमेश्वरयात थथे याइगु यः।✽
- 2 “काय् म्हायपिन्सं थः मां बौयात हनाबना तयेमाः” – परमेश्वरं बचंनापं तुं बियादीगु थ्व न्हापांगु आज्ञा खः।✽

✽ 5:22 ५:२२ कल ३:१८; १ पत्र ३:१ ✽ 5:25 ५:२५ कल ३:१९; १ पत्र ३:७ ✽ 5:31 ५:३१ उत २:२४ ✽ 6:1 ६:१ कल ३:२० ✽ 6:2 ६:२-३ प्रस २०:१२; व्य ५:१६

3 “अथे याना च्वंसा जक छिमिगु भिं जुइ, अले छिपि यक्व दँ म्वानाच्चने दइ।”

4 बौपिन्सं थः मस्तयूत तंचायकेगु याये मते, बरु इमित प्रभुयागु खँ स्यनेकने यानाः वय्कःया अनुशासनय् ब्वलंकी।*

दास व मालिक

5 दासतय्सं थः मालिकयागु आज्ञायात मनय् गयाःभय तथाः ख्रीष्टयागु आज्ञा थें ताय्काः मानय् यायेगु या।*

6 मालिकतयत लयतायकेत इमिगु न्ह्यःने जक ज्या याना क्यनेगु याये मते, बरु परमेश्वरया इच्छा कथं ख्रीष्टया हे दास थें जुयाः दुनुगलंनिसें ज्या यायेगु या।

7 मनूतय्गु मखु, बरु प्रभुयागु ज्या यानाच्चना धकाः मतिइ तथाः लयल्यतातां ज्या या।

8 दास जूसां मजूसां भिंगु ज्या याःपि न्ह्याम्हय्सित नं परमेश्वरं सिरपाः बियादी धकाः ला छिमिसं सि हे स्यू।

9 अथे हे मालिकतय्सं नं दासयात ख्याच्चः बीगु याये मते, छायधाःसा दासत व इमि मालिकत फुक्कसियां मालिक स्वर्गय् दी धयागु खँ सीकाति। वय्कलं ख्वाः स्वयाः न्याय यानादी मखु।*

परमेश्वरया ल्वाभः

10 पौ क्वचायके न्ह्यः जिं छिमित धाये – प्रभुयात विश्वास यानाः छिपि वय्कःयागु शक्ति बल्लाना च्वँ।

11 परमेश्वरं बियादीगु फुक्क ल्वाभः ज्वँ। अले छिमित शैतानं छुं यानाः नं स्यंके फइ मखु।

12 झीगु ल्वापु मनूतलिसे मखु। बरु आकाशय् च्वंगु दुष्ट आत्माया शक्ति, थ्व खिउँगु संसारया शक्ति अले थ्व संसारया शासकत व अधिकार दुपिनिगु फौज लिसे खः।

13 अयजूगुलि परमेश्वरं बियादीगु फुक्क ल्वाभः ज्वँ। अले मभिगु इलय् शैतानं हय्क्काः वःसां छिपिं व नाप ल्वाये फइ। अले लिपा तकं छिपिं त्याना हे च्वनी।

14 उकिं न्ह्याचिला च्वँ। सत्ययागु जनी क्वातुक्क चिना च्वँ, धार्मिकताया छातिपाता घानाः तयार जु।*

15 शान्ति बीगु भिंगु खँ न्यंकः वनेत लाकां न्ह्यानाः तयार जु।*

* 6:4 ६:४ कल ३:२१ * 6:5 ६:५-८ कल ३:२२-२५ * 6:9 ६:९ व्य १०:१७; कल ३:२५; ४:१

* 6:14 ६:१४ यशै ११:५; ५९:१७ * 6:15 ६:१५ यशै ५:२७

16 विश्वास हे छिमित बचय् याना तइगु ढाल खः। थुकिं छिमिसं शैतानयागु न्ह्याथें ज्याःगु मियागु वाण नं स्याये फइ।

17 मुक्ति हे छिमिगु तपुलि खः। अले आत्मां बियादीगु परमेश्वरयागु वचन तरवार खः।☆

18 न्ह्याबलें छिमिसं पवित्र आत्मायागु शक्ति कयाः प्रार्थना या, अले परमेश्वरयागु ग्वाहालि फ्वें। होशियार जु, अले न्ह्याथासय् च्वपिं विश्वासीतयगु नितिं मदिक्क प्रार्थना या।

19 जिगु नितिं नं छिमिसं प्रार्थना यानाब्यु। जिं नवाइबलय परमेश्वरं जितः वचन व नवायेत साहस बियादीमा, अले जिं वय्कःयागु भिंगु खँ नं मेपिन्त बांलाक ध्वाथुइका बी फयेमा धकाः प्रार्थना या।

20 थ्व हे भिंगु खँ न्यकेत जितः परमेश्वरं छवयाहयादीगु खः। कुंका च्वनेमाःसां जिं गुकथं नवाये माःगु खः उकथं हे मग्यासे नवाये फयेमा धकाः नं छिमिसं प्रार्थना या।

21 प्रभुयागु ज्या यानाच्च्वंम्ह विश्वास याये बहःम्ह झी यःम्ह किजा तुखिकसं छिमित जिगु खँ फुक्कं कनी।☆

22 जिमिसं छु यानाच्च्वना धयागु खँ न्यनाः छिमित नं साहस दयेमा धकाः जि वयात छवयाहयागु खः।☆

23 दाजुकिजापिं, फुक्कसितं परमेश्वर बाः व प्रभु येशू ख्रीष्टपाखें शान्ति, दया माया व विश्वास दयाच्च्वनेमा।

24 झी प्रभु येशू ख्रीष्टयात दुनुगलनिसें माया याइपिं फुक्कसितं परमेश्वरयागु दया माया दयाच्च्वनेमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7